

Syake saba kaplāŋ

Syaha fla

¹ Ndoo Syake kē, n ma tēntēfua Yāhā ye, ma suhu wo Yīnfua Yesu Crise ne. Yii Yiisrēfa mpāy, ye ma Yesu kāndeyārfa ma cāāŋ kāntraha kui bye wo, n syaha wāā ye kē.

Tee Yesu ta ye Yater, ye ma n naa laalaa pye laa ne ye!

² Wo nna, yii mpāy tee Yesu ta ye Yater, wāfāy ma ye dye, ye cā ye yee, wātānyāŋ wīi laa ne, -tee le ta nuhu wīi!

³ Ye ma Yesu ta ye Yater, ma kuee le wo ke wātānyāŋ wūhū naa bye ne, Yesu wīi ga nii gbāā fānga ne ye laam wo.

⁴ Yesu wīi le -sē nii gbāā wa fānga ne ye laam wo, loo ga ta ye n naa yia wātānyāŋ wūhū ter bye na. Loo na, ye ga ba nii nawee- mpāy syi Yāhā n kē, ye ga le le Yesu kānde wo, ye saa naa n kūn ngaa na ye.

⁵ Kai ma waa dye ye laam wo, tuu ga lii pye, u ma yee u sē le cā ye, u le kacān nar Yāhā ye. Koo gii ke n yō nawee- na ke sē ke laam war ye, ke ga te kacān wāā ufua kē.

⁶ U naa too syi kacān nar Yāhā ye. Awa, te syi -sē n nar Yāhā ye laantee nen ne, u ma n laalaa pye u yee, Yāhā saa re wāā u kē ye. Wii ma laalaa

pye, ufua ma lagblaha wāŋ syi dyaŋ, teflaha ke gblaha kue bye ye.

⁷ Uysi laalaafua ma syi u ngaa wāyāā wīl wūl Yīnfua koho wo ye.

⁸ Usyifua, ma'a u ta kāmbehe syāŋ nsoho wo, lii tuu ga sya, u saa le cā ye. Laalaa tee gbobo ter u na.

Nawūl tesē nangbāŋ ne

⁹ Mboo nawūl, taa Yāhā ta ma Yater, naa nuhu di, Yāhā ma kuā yir wa ncaha ye.

¹⁰ Mboo nangbāŋ wii ma Yāhā ta ma Yater, naa nuhu di, ma ma yagaa Yāhā koho wo, koo gii ke ma ta ma n ma wale yāŋ mii ngaa ge sē kē ye.

Ye sē yāā, nyēfyār yō, te wātoo sē -sē n sye ye. Nangbāŋ wīl ga ba kua mii nyēfyār wāŋ syi dyaŋ:

¹¹ Yai ga yir, ke ba war, ke nyē suhu waha, ke fyār n too, te nayōr n kua. Koo syi dyaŋ nangbāŋ ga ba ku kāā u waker laam wo, u wīl n kua.

Nwa ke wo tyīn n gaha kapee- wāpyen kue ye?

¹² Yāhā ma wii tān yāŋ wāfāy ne, ufua ma -sē u ya waha ma kuae Yesu kur ye, ma tyii Yesu wīl n nii gbāā u laam wo, nuhu ma ufua wān. Tuu waha yia loo na, u ga yiafua nkifai yāā. Loo ne cīinde yrā ne, lii wākuayāā wee le na ye. Loo yrā ne, Yāhā ke bii yē ter ma yee, koo wīl ma n tāy mpāy ye, ke ga ba loo yrā wāā poo kē.

¹³ Wii ma kōŋ n gaha kapee- wāpyen kue ye, u ma syi u yee: Yāhā kē, ke woo tyīn n gaha kapee- wāpyen kue ye ye. Yāhā koo na, kapee- wee ke troho tāy ye; ke syi, ke saha nawee- tyīn le kapee- wo ye.

¹⁴ Nawee nawee woo, u yĩnde wĩĩ ne, le u tyĩn n gaha kapee- wāpyeŋ kue koho na.

¹⁵ Yĩnde wĩĩ ma gboho nawee laam wo, loo le kapee pua see. Le kapee pua ma kuee u laam wo, loo le n pai gbã ne.

¹⁶ Ta laanfa, ya'a syi ye plaha nde ne ye.

¹⁷ Ye yai ye cã kayũhũ ya kē, ke n yir yāhāyĩn na. Yāhā kē ke re tege n wāā, koo gii ke yāhācāā-pye. Yāhā sē -sē wee yāhācāā- wāŋ syi, ma gbã n tã ye. Yāhā ke ma mii, ke ma koo syi yalebye.

¹⁸ Le tãŋ Yāhā ye, ke n ke cĩnde kapān pāā wo ye. Loo kapān ta, wo n nii yrāŋ na, ma nii wān kur bye yahasee ye, wān tii ke tāhā.

Yāhā kaplāŋ ngĩ: -ye ke luhu yō, -tee -sē naa ke kānde yār!

¹⁹ Wo nna, -ye ye laam yaha kaplāŋ ngĩ na, tē ga ye yar: -Ye naa ndityuhu yaha ye nampyeŋ kaplāŋ ye yalebye! -Ye naa laam ga ye cã naa n pāā! Ye ma syi ye maha naa ncafũhũ di farfar ye!

²⁰ Nawee laam ma war, kai- nkāy syi ke sron Yāhā ye, u saha koo pye nantāŋ ye.

²¹ Kai lii le ga waha wor ta nawee na carle gē tesē kai- nkāy ne ke ma wāpee-, -ye koo bye yi kāā ye laam wo. Yāhā ke kapān lii tāhā le ye laam wo, -ye yii tege tāā ye, ye le sya. Sukũhũ gaa laam wo, le ga waha ye sya yaha.

²² Ya'a syi ye naa Yāhā kaplāŋ luhu wāluhu ya ye! -Ye ke yigi, -tee naa le kānde yār! Mii loo sē ne ye, ye plaha.

²³ Mboo wii ma Yāhā kaplāŋ luhu wāluhu ya, ma sē -sē le kānde yār ye, ma ma mii wii dyan

tuu ma ne yirfayāŋ gbe, u u ya yāŋ u yāā, u yai u u ya gbihi mii.

²⁴ U ma u ya yāŋ wa, u yai u u teebɛɛ nkāy gbihi, u ga ta ter ke faha. U saa ke gbihi ye.

²⁵ Yāhā kānde sron, le ga waha nawee yi kāā u kapee- wāpyen yāmpar wo. Koo syi kē, u ma syi u le luhu wāluhu ya, tuu le faha ye. Mboo wii ma -sē Yāhā kānde wācā wī ke, ma le yigi klue sī ne, ma sē faha le kānde wūhū wāpyen ne ye, Yāhā ga kaa taha ma na ma kānkai- bye wo.

²⁶ Wii ma yee woo ma Yāhā kānde wo, u sē -sē waha u yīnkāi yigi ye, u plaha u ya ya, yīn wee u Yāhā kānde wāyār ter na ye.

²⁷ Yāhā kānde wāyār gii ke ma gbɛgbɛ, ma maha sron wo Tuhufua Yāhā ye, le nde: Ma naa ncir- kue yāŋ, calangusyam ne pe fen wo. Tesē drier kapee- nkāy ke nawee wī pye n klaha-, ma'a n tyii koo n waha yia ma na ye.

2

Ye ma syi ye naa waa puar waa na ye!

¹ Wo nna, yii mpāy tee Yīnfua Yesu Crise ta ye Yater, ye cā ma yee, nagboho tesē wāsey ne, te klon ter u na. Loo na, ye yai ye cā, ye sē yai ye nawee waa gbobo, tee waa klon ye.

² Yagaa dyan woo; waa, sān kāncrā ne kānde na, nangbāŋ nayreyūhū ne tuu le, ma ba dye ye yawāhā nwon wo; fenfua waa bya n -sē pa, nayreyraha ne tuu le.

³ Ye ga waha yir, ye nagboho ta u nayreyūhūfua ya na, ye u pye: «Dya, nangbāŋ niisaha nge, nii!» Tee -sē dur ye u nayreyrahafua pye ye yee: «Ho,

dya, yir yer kuee!» Laa na, ye ga u pye: «Niisaha ma wo tre tãy kãntraha na.»

⁴ Le ma -sẽ pye ke syi, ye ga waha yee la ye yii yãŋ wãcɛŋ? Aye! Ye cã, ye laangapeer me pe ye ta, ye mpãy puar mpãy na.

⁵ Wo nna, -ye yãŋ: Yãhã driyẽ nge fɛnfa yãŋ yi, ma yee pe Yesu ta pe Yater, u wĩ n nii pe ye wangbãy laa dyaŋ. Loo n ta pe n ba dye Yãhã Yai wo, koo fla gii Yãhã bii yẽ ter ke wãwãã wĩ ne nawee- mpãy kẽ, ke wĩ gboho pe laam wo.

⁶ Yii sã -sẽ nawũũ yãŋ nawee draha wo ye. Ha ndee, pe walefa poo pe ye fãŋ? Poo sã na, pe ne ye tyĩn ga, pe ga ye sãhã pe fãngafa yahasee ye?

⁷ Poo sã maha na, pe ne naa Crise miyũhũ nge sar, ke miyũhũ gii ke taha ye na?

⁸ Yãhã sabangbãŋ wo, kãnde lii Yãhã le ta, le katan lii le ma ke katan byɛ yahasee ye, le yrũhũ yar ma yee:

«Ma ya wĩ le n tãy ma ye mii syi dyaŋ, tyii ma nampyeŋ wĩ n naa n tãy ma ye ke syi!»
Ya'a pye, tee le Yãhã kãnde katan nde yãr, le yõ.

⁹ Ya'a -sẽ waa puar waa na ye kãnkai- wo, kapee ne tee n pye. Yãhã kãnde na, ye tee pye. Ye ga wãpɛn yãã le na.

¹⁰ Mboo nawee, taa le Yãhã kãnde katan nen laa miy yaha, le ma mii le Yãhã kãnde katan kur byɛ kẽ taa miy yaha.

¹¹ Ye sã yãã, Yãhã kãnde katan laa yee: «Ma'a n cayɔr le ye!» Katan laa maha yee: «Ma'a n nawee boo ye!» Kãnde lii Yãhã le ta, ke katan syãŋ ngĩ byɛ ma wãcɛŋ. Ma'a sya yee, ma sã cayɔr le ye, ma -sẽ ga nawee boo, ma yai ma cã, ma le Yãhã kãnde miy yaha.

¹² Loo na, ye yai ye ta, ye yě kaplāŋ n naa n yō ye ye tesē ye pyer bye ne. Ye sē yāā, ye ga ba kasāhā yāā le Yāhā kānde na. Le sron, le ga ba nawee- yi kāā kapee- wāpyen yāmpar wo.

¹³ Mboo wii taa sē ma nampyen fen di ye, sukūhū gaa laam wo, Yāhā sē -sē ga ba ma fen di ma wāsāhā na ye. Ye yai ye -sē le cā ye yee, fen wādin n tāy ma ter kasāhā yaha.

Yāhā wāta Yater tesē Yāhā laam wīl wāpyen ne

¹⁴ Wo nna, nde ma la yīn ne nawee ye, u ma yee yě ya ne, «Yāhā koo, ke ma ra Yater,» u sē -sē Yāhā laam wīl pye ye? Woosyifua ga waha sya yaha la u kapee- wāpyen wo le syi ne?

¹⁵ Ngaa dyan, taa ma Yesu kāndeyārwe waa yāā fen wo, faha wān wee u ye ye, digi wīl maha waha u na,

¹⁶ ma'a u pye ma yee: «Wo kuee per gaa na, Yāhā n sya ma n kuee wāwee, Yāhā n ma kē kale wān ne tesē dir ne busāā, ma n di naa n yai, segber n naa n kuee.» Ma'a -sē yee, ma sē u kē too wān nde ne ye, ma yě kaplāŋ sē nii la tefay dyan?

¹⁷ Yāhā wāta Yater wīl ma koo syi. Ma'a Yāhā ta ma Yater, ma sē -sē ke laam wīl pye ye, ma Yāhā wāta Yater ma wāwaha.

¹⁸ Mboo nawee wii taa Yāhā ya ta ma Yater, ma sē -sē Yāhā laam wīl pye ye, n ga waha ma pye: «Mboo, ma Yāhā ya ta ma Yater, ndoo -sē Yāhā laam wīl ya pye. Ke syi waa ma ndoo yāā, tē nii Yāhā laam wīl pye, u ga cā u yee, n Yāhā ta ra Yater. A mboo, waa ma ma yāā, ma sē Yāhā laam

wĩ pye ye, u ga pye mii u cã u yee, ma Yãhã ta ma Yater?»

¹⁹ Ma sê yee la, a Yãhã neŋ ya kē ke ma? Le sron yō; sãndãpee bye le cã ke syi, ma n sege fyar koho wo. A mboo, ma lii pye loo nde wãcã wĩ ne?

²⁰ Mboo nawee wii taa sê laam ga ye, ma n traha la le yar ma na, taa ma Yãhã ya ta ma Yater, ma sê -sê Yãhã laam wĩ pye ye, le ma wãwaha?

²¹ Ma laam faha la wo faale wãdyaha Brama wĩ na? U bii sron Yãhã yĩnde na. Ah ndee u Yãhã laam wĩ wãpyeŋ kē le bii ta, u n sya bii u puee Yisyake yigi woo ga diŋ yi Yãhã kē?

²² Ma sê le yãã, u bii Yãhã ta u Yater, ma maha naa ke laam wũhũ bye pye. Loo le bii ta u Yãhã wãta u Yater n pye u ye yĩŋ ne.

²³ Loo nde n ta, Yãhã sabangbãŋ kapãn nde n nii cĩnde, lii le n yee:

«Brama bii Yãhã ta u Yater,

ma ke kapãn sya le yaha kaplãŋ bye yaha ye.

Yãhã n -sê yee, u sron koo yĩnde na.»

Yãhã n u ta ke naambiyã.

²⁴ Ye sê le yãã, nawee wii ma nii Yãhã laam wĩ pye, loo ga ta u n sron Yãhã yĩnde na. Le sê yai ma ke ta ma Yater yẽ ya ne ye.

²⁵ Faale canaandile Arabe* wĩ ma ke syi. Woo kē tuu bii koho le Yiisrefa tēnlehe ye, ma bii pe ta, pe n bii fāsaha yãã kãnde laa ter ne. Yãhã laam wĩ nde tuu bii pye, le bii ta Yãhã n yee, u sron.

* **2:25 2.25** Yerekoo klo yahaseefa naa Yiisrefa tēnlehe nawee-syām kē le klo laam wo. U Arabe n pe wũhũ u nwon wo. Kur ye, u n pe ta pe n yi fenaater ne le klo nkur ye ma ter.

26 Ma'a kadye yãã, wũũ wee ke wo ye, kakugu kē. Taa Yāhā ta ma Yater, ma sē -sē ke laam wĩ pye ye, le ma mii kakugu dyaŋ ma ye.

3

-Ye ye yĩnkāi wāyigi cā!

¹ Wo nna, nawee- wāklaha, ye ma syi ye naa loo ke buarbuar ye. Ye sē cā la kasāhā per wo, wii mpāy too nawee- klaha, Yāhā ga ba wo sāhā kayi ne nawee- bye na.

² Wo bye wāteepye ter syar. Wii ma yee u sē tee n pāã ye, woo ter le le Yesu kānde wāyār ne. U ga waha yia u ya koho kadye kur bye na, u naa u ya yigi.

³ Nsyāŋ yē sē na too ne karfee le, ke naa n luhu wo ye, wo n cā waha yia, wo naa ke sroŋ.

⁴ Ye sē maha salangbāŋ wĩ wũũ yāŋ la? Ke wāgboho naa bye ne, teflahangbāŋ ma ke tra, ke n fā. Ke sroŋsaha -sē ma wāpuage ya, ke fāfa n ke sroŋ kuε ngii ma pe tāy.

⁵ Yĩnkāi ma ke syi nawee yē laam wo. Le kloŋ, ma -sē le ya sey kangbāhā ne.

Ye kāhā cāã kataha nyēfigi wĩ wũũ yāŋ. Ke sroŋ gboho. -Ye yāŋ, naancremuu ya -sē ga waha ta, ke bye n suhu tāŋ.

⁶ Yĩnkāi ma mii naa dyaŋ. Kapee- ter bye n yi nawee yē wo. Yĩnkāi ga waha kapān nen laa pāã yi, le n ka yaha ye mii kataha naa dyaŋ pe le, le le kapān pāāfua wĩ bye pye klaha- tāŋ. Koo naa nge n yi ke naangbāŋ fla wo sāndāpee pe ma na.

⁷ Nawee waha n yia wlaha wān ter bye na, ma te klaha n ta kaha wān: Treresyar wān woo,

kānsyām woo, kahakaha wān woo, fua- woo, te bye.

⁸ Waa sē -sē waha n yia u yīnkāi na, ma le ta le n yaha n le ye. Le pee. Yalebye, loo ne, le ma le wā n klaha ke yē laam wo. Sōr sāj fla te ma yīnkāi wo.

⁹ Loo roo n ta, ma wo Tuhufua Yāhā sey. Loo yīnkāi nen ya roo maha n ta, ma nawee- sē yoosēn ne, nawee- mpāy Yāhā pe tāhā, pe n sya ke tay.

¹⁰ Kaplāyūhū wāā n yi wācēŋ kaplāmpee ne yē tee nen wo. Wo nna, ya’a n sya le n nii ke syi ye!

¹¹ Waa sē lapihi yāā tesē layūhū ne te wāā n yi plege neŋ wo ye.

¹² Wo nna, waa sē nasar nkugu katiyigi yāā yāā ke kasyāhā sa ye. Waa sē maha defī katiyigi yāā yāā ke nkugu sa ye. Waa sē maha tetege loho yāā yāā ke klaha nii lawōŋ ye.

Yāhā laantor

¹³ Kacāŋ yīntatoo waa ma la ye laam wo? Le ma pye āwā, u ta wo n u yāŋ cā u yīntatoo troho wātāhā ter na, tuu maha u ya tege tāā ye, u kayūhū nkāy pye.

¹⁴ Ye ma yee kacāŋ yīntatoo me ye ne, ya’a -sē laanyar pye, ma maha yīi laam wīi ya kar, cīnde sē ne ye, ye kawar fua, kacāŋ yīntatoo sē me ye ne ye.

¹⁵ Too kacān ter nde syi sē n yir yāhāyīŋ na ye, te syi n yir nawee- ye kāntraha na, Setane sāndāpee yīŋfua koho wo.

¹⁶ Ye sê yāā, laanyarfa ma pye teelii wo, ma nii pe ya laam wīi ya kar, kapee- ter bye ga naa n pye ke fla na, kawlāhā ter bye ne.

¹⁷ Laantor tii te -sē n yir yāhāyīn na, te ma gbegbe, te n pai kusyir ne, laanyīn ne, nampyen fēn wādiŋ ne, kayūhū wāpyen ne. Te sron, ma maha ma yaayaa. Kacāŋ laantorfua sē n dye kue ngaa ye, ma kue ngaa ta n yaha ye, u sē maha u nampyen wlan ye.

¹⁸ Laanfirfa poo pe n pai kusyir ne tesē yrīn ne pe kānkāyfa kē. Le ma mii yēy dyan pe n tāhā, yēy gii ke wīi n tāy Yāhā ye. Ke yēy n lē ma n pai wāsrōn ne Yāhā yīnde na.

4

Ye tee driyē wūhū ta yaha ye, Yāhā wūhū na

¹ Nwa ke sesrār yir ye nsoho wo tesē wāhā ne? Ye laam kapee- koo sē na ke syar, ma nii ye fāy ye laam wo?

² Ye ma ngaa klāŋ, ye sē -sē ga waha ke kla yāā ye, ye ga yer nawee wāboo na, koo kla wīi na. Ye kāāŋ n yāŋ gbegege, ke ne pye ye wāŋ, ye sē -sē ga waha ke syi yāā ye. Koo syi ke n pai sesrār ne ye nsoho wo. Ye sē Yāhā nar ye, koo kē ye sē ne ke kla yāā ye.

³ Ye ma sya Yāhā nar, ye wānar ter sē ne tāy ke ye ye, koo kē, ye sē ne ngaa yāā ye. Yatan wūhū ya tee ne naa n nar.

⁴ Ye cā ye yee, wii, driyē nge wān n tāy u ye, Yāhā napīi kē u ne. Wii ma n ke, woo ga u ya ta driyē naanfān difua, u u ya ta Yāhā napīi. Ye sē

cā la, driyē wūhū tesē Yāhā wūhū ne, ke saha ke ya gbe ye.

⁵ Yāhā sabangbāŋ wo le yrūhū ta ma yee: Yāhā ke Yrā le wo laam wo. Ngaa ter ma gboho wo laam wo Yāhā Yrā na, le ga naa ke yaa, ke n naa ke Yrā wī yey wo ye. Wo yai wo wii wāā tāŋ Yāhā kē. Ye yee la, kapān nde ka yrūhū yaha ke dyaŋ?

⁶ Yāhā -sē maha ke laantār yar wo na; loo ne, le yrūhū ta Yāhā sabangbāŋ wo ma yee:

«Yatanfa wī sye Yāhā ye.

Mpāy pe -sē pe ya tege tāā ye,

Yāhā ke laantār yar poo na.»

⁷ Koo kē, -ye yīŋ kor le Yāhā kē! -Ye yii waha, ye Setane sāndāpee yīŋfua kar naa n wāā, u -sē ga fā naa n dey ye na.

⁸ -Ye crā Yāhā na, ke bya -sē ga crā ye na. Kapeepyefa mii, -ye ye klue yee yi kāā kapee-wāpyeŋ wo! -Tee ye laam ta pe n nii gbegbe, yii laanteesānsyāŋfa mii!

⁹ Ye cā ye yee, ye ma kāmpee wo, -tee kayaan yigi, ye naa ke wūn; -tee ye tetyehē ta, te n wā klaha miyāhā, ye laanfīr wūhū, ke n wā klaha nii kayaan wūhū!

¹⁰ -Ye yii tege tāā ye Yīŋfua kē, u -sē ga ye kuā yir.

Waa ma syi naa u nampyeŋ miipihī yee ye!

¹¹ Wo nna, ya’a n naa yii wāpee pāā ye! Wii ma nii u nampyeŋ wāpee pāā, ma maha nii u miipihī yee, ufua Yāhā kānde wāpee pāā, ma maha le miipihī yee. Kānde lii Yāhā le ta, mboo

wii taa -sē le miipihī yee, ma wee le yārfua ye.
Le miipihī wāyee, loo ya taa pye cā.

¹² Yāhā gii ke le kānde ta, koo ya ke ga waha naweeyō cā naweepee ne. Koo ya ke ga waha nawee sya yaha; koo ya ke ga waha nawee pēn. Ah mboo ma nwa, mboo wii raa ma nampyen miipihī yee?

-Ye ye kānkai- le naa n soho Yāhā koho wo!

¹³ -Ye luhu ra ye yagaa, yii mpāy tee ne yee: «Wa'a yee, wo sē ka klo nde syi wo nanga ye, sukūhū waa ka le wo, wo ga dyē nen pye cātroho na, wo wale yāā.»

¹⁴ Ye -sē ye wāyir yāā wa la sukūhū? Ye wee la kāmbila wāŋ syi dyaŋ, u tāyale ne, yalaale ma ba nō, u caa.

¹⁵ Ye yai ye yee: «Yāhā ma sya, wo n kuee wāwee, waa nde pye nde ne.»

¹⁶ Yataŋ -sē gboho ter ye na, ye n sya yii sey. Too syi yataŋ sē yō ye.

¹⁷ Wii ma kayī lii yāā, u yai u lii pye, u ma -sē ke wāpyeŋ sye, le fue ma ufua na, le ma kapee ne wāceŋ.

5

Katōryar nangbān wī na

¹ Yagaa, -tee -sē luhu ra ye, yii mpāy tee ma nangbāy! Ye cāā naa ye mii wūn kule ne, kawlan ma, ke n pai ye dye.

² Ye nangbān wān nde, te fūhū. Waytōrbir maha ye fahawān le fer.

³ Ye sān tesē ye war ne, too nde bye te ma korfyāhā gaa ter syi ne. Yāhā kasāhā per wo,

koo kɔrfyāhā nge ga ba le yaha ye na, ke dur too ye kadye na, ke ye pye gbai naa wāŋ syi. Ye nangbān wān wāā ta, le -sē nde driyē plii kua kua wa.

⁴ Ye sē yāā ye tar tēntēfa war dāā pe kē ye. -Ye naa n luhu pe yēkuān ye! Poo mpāy pe ye tar dir war gbe naa n yi ye kē, pe tēŋ ga dye Yāhā ndityuhu wo, Yāhā gii ke ma tāŋ kai- bye fānga ne.

⁵ Ye nangbān wān yāā kāntraha nge na, sīsī wān ne, ma di gboho mii naha gii syi dyaŋ pe n pai boo gbā na.

⁶ Mpāy pe sē wāpee pye ye, yii -sē wāpee yāā pe na ma pe boo; pe sē waha kān gē kān ye koho wo ye.

Yāhā kānde troho n tāhā mii?

⁷ Wo nna, -ye ye laam yīn wo Yīnfua Yesu n sya ba yir yāhāyīn na, u dur ba. Ye sē tawarfua yāā la, tuu ma ne u laam yīn, u sya ba u tar digi yāā gbe? Ah ndee, u ne cāā u laam yīn, u sesafāŋ sēŋ u cā digi tāhā, -tuu u laam yīn, u blokūyār sesar sēŋ te n too. U blokū ga ba sesyar kūū, u pua too, u n cā u yaa.

⁸ -Ye ye laam yīn ke syi yii ndoŋ, tee kaa taha yii na Yāhā kānde wīī ne, ye naa wo Yīnfua wādurbaŋ sēŋ, koo gii ke gbe taha.

⁹ Wo nna, ye ma n nii kapirfa yii nsoho wo ye. Mii loo sē ne ye, Yāhā ga ba ye sāhā kayi ne. U wāpaŋ gbe taha.

¹⁰ Wo nna, ye Yāhā kaplāŋ tōrfa wīī wūū yāŋ, poo mpāy pe naa n pāā Yāhā myaha ne. -Ye yāŋ pe na, pe laam wāyīn ter ne pe fēn wo.

¹¹ Pe bii waha pe ya na too fengbăn wo. Koo kē nanga wo n yee, pe wĩ n tãy. Ye sē faale Syobe wĩ luhu la, tuu pye fengbăn wo, ma -sē bii u laam yĩn. Yāhā ke ngii wāā u kē loo kur ye, ye maha loo bye cā. Ye sē yāā, Yāhā nawee fēn di busāā ma maha kayĩ pye u kē.

¹² Wo nna, lii le maha pee, ya'a syi naa Yāhā di yāhāyĩn myaha ne, tesē kântraha myaha ne ye. Lii ma pye cĩinde, -ye yee āwā, ya'a n Yāhā di taha le na ye! Lii ma pye kawar, -ye yee aye, ya'a n Yāhā di taha le na ye! Mii loo sē ne ye, Yāhā kasāhā ga ba ye yigi.

¹³ Ye laam wo, wii ma pye tuu fēn sya, u naa Yāhā nar le ne. Wii ma pye nuhu wo, u naa Yāhā wāsey yay le.

¹⁴ Wii ma pye yan kafēhe na, u Yesu kāndeyārfa yahaseefa yee, pe n ba Yāhā nar u kē pe sēm- ta, pe u tuhu Yĩnfua Yesu myaha ne.

¹⁵ Pe ma Yāhā nar laantee nen ne, pe ma yee pe sē laalaa pye ye, ma yee Yāhā ga waha u jaa cĩinde, Yāhā ga u yĩnwer dur u kē. Kapee- ma pye u yĩn na, ke ga kua kãā u na.

¹⁶ -Ye le sya, ye ye kapee- pãā naa n yi yii ye, -tee maha naa Yāhā nar yii kē ye wākāhāyir wĩ na. Nawee wii ma sya, ma koo pye, u -sē ga nii temm Yāhā yĩnde na. Ke syi u ma Yāhā nar laantee nen ne, le ga fla sya u ye.

¹⁷ -Ye yān le yān faale cāā Yāhā kaplān tōrfua Yeli wĩ wo. U sē pye la nawee wo wān syi dyan? Ma -sē nwo, tuu bii Yāhā nar sesaha wāyigi wĩ na. Sesaha n yer cĩinde, dyē- tãā yrey kuay ne.

¹⁸ Loo kur ye, u n maha bii Yāhā nar ke wāmiyaha wīī na, yāhāyīn n yār sesar n nii n too, kāntraha wān n maha nii n sa.

¹⁹⁻²⁰ Wo nna, ye laam wo, wii ma le cīinde kānde miy yaha ma plaha, u nampyen waa ma waha yia, ma u plahasaha yar u na, ma u dur le le kānde laam wo, ye cā ye yee, u nampyen u yrā tyīn sya gbā koho wo, ma maha paha tã u kapee-busāā na, ke wīī saa naa n pāā nantān ye.

Yãhã Naambiyãrfã Saba
Karaboro, Eastern: YÃHÃ NAAMBIYÃRFÃN SABA
New Testament

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2025-07-10

PDF generated using Haiola and XeLaTeX on 19 Dec 2025 from source
files dated 10 Jul 2025

15120496-00e2-503a-8d40-2d7cfd1ba5b